

四部叢刊三編史部

編年通載

存四卷

據商務印書館一九三五年版重印

四部叢刊三編(七)

編年通載 宋章衡撰

太宗皇帝實錄 宋錢若水等撰

上海書店印行

上海福州路四二四號

上海影印廠印刷

1985年7月



刊印編年通載序



史學之不講久矣漢魏已來以是名家者不
過數人歷世既遠載籍漫汗學者披文考古
如乘桴涉海而欲窮其津涯未易得也至有
皓首疲精弊弊於編簡文字之間問其前代因

革之端紀年號名之同異何者爲正何者爲
僞一治一亂姦雄割據天下之所以離與其所
以合之由茫然不能對者多矣嗚呼天地之
理求於簡易而可以得六合之廣據於會要
而可以觀不居其簡而欲致其詳不執其要

而欲會其衆斯亦惑矣族姪衡子平以文辭
舉進士當

仁宗朝擢爲第一自布衣時已留心於茲學
會叢經傳諸家之所載研磨編綴積二十餘
年而後書成列爲十卷名之曰編年通載斷

自帝堯以訖于

皇宋丁未之歲總三千四百年推曆甲子以
冠其首而爲之次第焉史有訛謬爲刊正之
事有疑誤爲明辨之若夫世數之代易歷統
之相傳年名國號散殊重複凡廢興治亂之

地割裂合并之因災祥善惡罔不具載開卷
推迹粲然如黑白之在目其論議有條理得居
簡執要之術蓋歷代史籍之管轄也夫以二
十萬言而包括三千四百年之事上下馳騁
靡有缺漏措意初若煩勞而卒會於簡易

非敏識好學篤志而強力烏能爲之哉是書
也甲寅歲嘗進御於

神宗皇帝備

乙夜之覽當時頗蒙稱獎子平祕而不以示
人予病近時儒者篤於窮經而未皇及傳記

簡策之學間有從事於斯者如前之云云因
募工鏤板以廣其傳庶幾讀之者用力甚少
而收功彌博噫士之不欲知古昔則已如欲
從容間燕上論其世視數千百歲之遠如在
掌上捨此書何以哉又如

朝廷作新法令更易制度凡禮樂刑政之所
關教化沿革之所自紀元立號於此質疑上
則資

人主之顧問次則備平居之遺忘據舊鑒新
可以縷數然則補助學問豈尺寸之功歟博

學多識之君子覽之無忽也元祐三年六月
初一日建安章 案謹序

進編年通載表



臣衡言臣聞今之所以知古後之所以知今
其君臣之系治亂之迹紀歷之元必憑諸史
以傳天下茲事體大自昔才難臣衡誠惶誠
懼頓首頓首竊以堯舜二典夏商周之訓

誓誥命春秋之二百四十二年行事皆出聖人
手筆渾深奧密莫敢倫擬兩漢以來自馬遷
因秦火之餘輯殘脫之經及戰國百家之說
又率己意易編年而爲紀傳世家表書上下
數千載最爲雄贍采摭精粗不能無失

摠三千四百年目之曰編年通載其刊正謬誤
如史記以爲舜年二十以孝聞三十堯舉之五
十攝行天子事六十有一而踐帝位在位三十
九年今以虞書考之則舜生三十登庸三十
位五十載乃知司馬遷之妄如魏受

漢禪漢紀以爲延康元年十月乙卯魏志以
爲十一月庚午受禪壇碑以爲十月辛未夫禪
代大事也而三說不同今以詔冊書令推之
實以十月乙卯策詔使奉璽綬二十九日辛
未始登壇受命乃知史官之失佗類此者何

可勝道

本朝建隆之元歲在庚申至于治平四年丁

未一百八年

五聖相承四海一統其神功睿德巍巍蕩蕩

充塞天地莫得而名其號令法度載于國書

又莫得而見且今所書者或得於詔勅或得
於圖錄或得於十國傳志或得於羣臣家集
略舉大綱以貽萬世於戲夏有天下四百三
十二年其爲善治者啓少康五十九年而已
商有天下六百二十九年其爲善治者太甲